



# Fusa sokn



# Årsmelding 2023



## A. Innleiing

*"Menighetsrådet skal ha sin oppmerksomhet henvendt på alt som kan gjøres for å vekke og nære det kristelige liv i soknet, særlig at Guds ord kan bli rikelig forkynt, syke og døende betjent med det, dømte gis dåpsopplæring, barn og unge samlet om gode formål og legemlig og åndelig nød avhjulpet".*

«Ordning for Den norske kyrkja» sin § 12

Det er dette det nye Fusa sokneråd, vald i 2023, skal ha fokus på dei neste fire åra. 2023 var eit år der ein såg at mykje var i endring – i verda, i Bjørnafjorden, i kyrkja og kanskje òg i kyrkjelyden. Ustabilitet, krig, nedskjeringar, sjukdom. Midt i dette skal Fusa sokn peika på Jesus – håpet for verda, håpet for æva. Gjennom alle aktivitetar og i alle fellesskap i 2023 formidla tru, håp og kjærleik til fusingar.

## B. Gudstenester

Gudstenestene skal vera pulsslaget i kyrkjelyden!

*Lat oss ikkje halda oss borte når forsamlinga vår kjem saman, som nokre har for vane, men lat oss setja mot i kvarandre..... (Hebrearane 10.25)*

2023 var det til saman 92 gudstenester og det var totalt 5169 til stades på gudstenestene, ein auke på 3% frå 2022. Gjennomsnittstalet pr gudsteneste var om lag 58 deltakarar og talet på nattverdsgjester var 1249. Det er oppgang frå høvesvis 56 og 1166 året før, men det er likevel ikkje like gode tal som før pandemien.



Kyrkjekaffi utanfor Fusa kyrkje

Ein del lekmannsgudstenester vart haldne av kyrkjelydspedagogen og av dei skulerte frivillige medarbeidarane, både gudstenesteleiing og forkyning. I nokre bygder er tal deltakarar på vanlege høgmesse lågt, og synkande. Der det ser ut til at me har jamt høgast deltaking er gudstenestene på Eikelandsosen bedehus.



Familiemix på Eikelandsosen bedehus.

## C. Trusopplæring

Trusopplæring har vore eit satsingsområde gjennom mange år og det nasjonalt sette fokusområdet er 0-18 år.

Me skil mellom kontinuerlege tiltak som er t.d. søndagsskule, kor m.m og breiddetiltak i trusopplæringa. Det har tradisjonelt vore god oppslutning om trusopplæringsarbeidet i Fusa, men oppslutninga har dalt jamt og me kjem nærmare landsgjennomsnittet. Det er ei stor oppgåve å skape medvit hos foreldra om at dåp og opplæring høyrer uløysleg saman, slik at deltaking i trusopplæringa kan verta normalisert for alle døypte.

I 2023 har me hatt litt vakanse på trusopplæringsstillingar. Dette har gjort at det har vore litt utfordrande å få tiltak opp å gå



igjen etter pandemien, samstundes som årskulla i Fusa-bygdene er små. Ein har slått saman fleire breiddetiltak og fleire årsklassar i tiltaka for å få nok påmelde til gjennomføra tiltaka.

Alle døypte barn i Fusa får ein lokalt tilpassa **dåpsperm og CD** med lokale song- og musikk-krefter.

**Musikk frå livets begynnelse/Babysang** (0-2 år) vart gjennomført både på våren og om hausten. Små fødselskull i Fusa-bygdene gjer at tal aktuelle barn er færre enn tidlegare.

**3 år** – 3-års adventssamling på E.osen bedehus med godt oppmøte.

**4 og 5 år** – Utdeling av Bibelbok og kors-smykke i kvardagsgudsteneste på E.osen bedehus. Fullt hus med alle generasjonar!

**7 år** – Lesetund på Eikelandssosen bibliotek.

**8 og 9 år** – Tårnagentdag i Hålandsdal kyrkje.

**Konfirmantåret** – eit omfattande tilbod til alle 14-åringane. 43 ungdommar vart konfirmerte i mai 2023, og 22 (lite kull) starta på nytt konfirmantår til hausten.

**13-18 år** – Ungdomsgudstenester på E.osen bedehus vårsemesteret 2023.

Alle som har eit **års dåpsdag** får tilsendt «God-natt»-plakat og **to års dåpsdag** spisebrikke.

*Av kontinuerlige tilbod i 2023 kan nemnast:*

**Ungdomsgudstenester** var i 2023 ope for alle, men samstundes ein del av konfirmant-opplegget. Sidan det er eit svært lite konfirmantkull i 2023-2024 vart det ikkje sett opp eigne ungd.gudst. hausten 2023.

**KLUBBEN** for tweens 5.-8.klasse låg nede våren 2023 p.g.a. mannskapsmangel, men starta opp att hausten 2023 med bra oppmøte og jamnlege samlingar. Eit viktig tiltak som har fått bra driv att etter tilsetjing av kyrkjelydsarbeidar.



*Fjord'n barnekor i fint driv!*

**Fjordn`n barnekor** har god oppslutnad, opp mot 30 barn, og fyller stadig bedehuset med song og liv.

**Fusa Soul Children** hadde prosjekt både våren og hausten 2023, med konsert, gudsteneste og julekonsert. Om lag 15 barn var med i 2023. **Songbuketten**, ein blanding mellom barnekor og barnelag, har jamt godt oppmøte og er eit viktig tilbod for barn i søre Fusa og for lokalmiljøet i sør.

**NOAH**, friluftsklubben for gutar 5.-8. klasse, har i mange år hatt flinke og dedikerte leiarar og bra oppmøte av deltakarar. Eit strålende tiltak som har betydd mykje for ein heil del gutar i mange år. I 2023 har tal deltakarar auka att og ein fin gjeng møtest jamnleg til mange spanande aktivitetar.



*Friluftsklubben NOAH på Skogseidvatnet*

## **D. Diakoni**

Diakoni er kyrkja si omsorg for medmenneske. Fordi Gud har elska oss først.

Diakoni-arbeidet spenner over heile arbeidsfeltet til soknet, inn i alt me gjer.

Fusa frivilligsentral, som soknet eig, vart starta opp som ein del av soknet si diakonale teneste.

**Matgåve-Matglede:** Samarbeid mellom kyrkja, frivilligsentralen, Nav, Fjord`n Senter/lokalt næringsliv:

Nesten 60 matposar med julemat vart delte ut til personar og familiar som hadde meldt behov. Både behovet og givargleda var rekordstort i 2023, og utan store pengegåver frå næringslivet hadde me ikkje klart aksjonen. Når aksjonen starta for 7 år sidan var det 4 matposar som vart gjeven ut, i 2023 var det altså 60.



*Frivillige pakkar matposar til jul*

I samband med minnegudsteneste delte **Diakoniutvalet** i kyrkjelyden ut lys og helsing til pårørande etter dødsfall siste året.

Diakoniutvalet i lag med Frivilligsentralen starta òg etter etterspørsel opp tilbod om **Sorggruppe** i 2023.

Gjennom gravferd og elles ved dødsfall vert det utført diakoni, men det meste av diakonien er uorganisert gjennom einskildmenneske som stiller opp for andre. Dette skjer gjerne gjennom frivilligsentralen sitt arbeid og gjennom barne- og ungdomsarbeidet.

Frivilligsentralen har eiga årsmelding som syner deira store breiddeengasjement. Ein vil her også nemne Bruktbuo og arbeidet som spring ut derifrå – viktig nettverksbygging – og inntekter derifrå

kjem både brannskadde born i Etiopia og det kristne barne- og ungdomsarbeidet lokalt til gode.

Bruktbuo vart i 2023 skilt ut frå Fusa sokn si drift og over til ny organisasjon; Foreininga Bruktbuo. Denne endringa hadde først og fremst med driftsform og m.v.a.-problematikk å gjere; føremål og drift er ikkje endra som følgje av dette.



**Besøksteneste** - I samarbeid med frivilligsentralen har ein tilbod om besøksteneste. Lokalt er truleg einsemd hjå gamle og sjuke den største diakonale utfordringa me har.

**Naudhjelp** – Det mest kjende er den årlege fasteaksjonen til **Kirkens Nødhjelp**, som i 2023 gav vel 65 000,- kr. I tillegg har Fusa sokn samla inn vel 20 000,- til hjelpearbeid i **Ukraina**

**Institusjonstenester** - Det vart gjennomført 50 institusjonsandaktar og mange besøk til enkeltpersonar på institusjonane.

**Vigsel.** Det var 12 vigslar i 2023.

**Dåp.** 25 barn vart døypt i Fusa sokn i 2023  
**Gravferd.** Det var 26 kyrkjelege gravferder i 2023, eit ganske mykje lågare tal enn vanleg.

## E. Misjon

Frå sommaren 2016 har Fusa sokneråd også engasjert seg i arbeidet for å hjelpe brannskadde born i Etiopia – gjennom **Children Burn & Wound Care Foundation (CBWCF)** og dr Einar Eriksen sitt arbeid. I 2023 hadde me ikkje storaksjon (Walk and Run blir arrangert annakvart år). Men det er stort engasjement for dette føremålet, m.a. blant gjengen i Bruktbuo. Til saman har Fusa sokn og Bruktbuo bidrege med meir enn 100 000,- til CBWCF i 2023.



*Friluftsgudsteneste på Vinnesholmen – uansett vær!*

Frå 2012 har me hatt eitt, samla misjonsprosjekt i Fusa – elevstipend til studentar ved **Tabor utdanningscenter** i Hawassa i Etiopia. Dette gir ungdom som elles ikkje ville hatt høve til det – eit Bibelskule- og utdanningstilbod. Frå 2016 har Fusa kyrkjelyd dessutan finansiert skulepengane til to studentar ved Tabor Utdanningscenter. Det vart samla inn om lag kr.35.290,- til elevar og studentar i 2023. (kr. 30949,- i 2022, kr. 26399,- i 2021, kr.15.094,- i 2020 og kr.28.500,- i 2019).

## F. Anna kyrkjelydsarbeid

**Forbønsteneste** – Fusa sokn har eigen bønkontakt som enkeltmenneske kan ta direkte kontakt med for forbøn. Bønkontakten har eit bønenettverk som blir involvert når enkeltmenneske ønskjer

det. Sjølv sagt kan ein også ta kontakt med prest eller andre i kyrkjelyden som ein har tillit til – om det er ønskje om forbøn. Forbønstenesta er aktiv.

Det er **faste bøn samlingar** annankvart onsdag frå kl 17.30 til 18.00 på forskjellige stader i kommunen; Foer bedehus, Nordtveit bedehus, Eikelandssosen bedehus og i Hålandsdalen kyrkje. Viktige samlingar der ein regelmessig ber for og velsignar det som skjer i dei forskjellige bygdene.

**Kveldsbibelskule** – Som i 2021 og 2022 har ein i delar av 2023 arrangert undervisningskveldar på Eikelandssosen bedehus, ein onsdagskveld i månaden. Sokneprest Einar har organisert desse kveldane. Han har både undervist sjølv ein har hatt andre lokale og tilreisande undervisarar. Tilbakemeldingane på dette tiltaket er veldig gode.

Ein onsdag i månaden arrangerer soknet **Bibel, Bøn og Lovsong**. Dette har lang tradisjon hos oss, og med andakt, lovsong og bøn vandring i litt meir uformell setting enn gudstenestene er, er dette gode samlingar med god deltaking.

**Bibel- og samtalegrupper** – der er nokre bøn- og samtalegrupper i sving i kyrkjelyden. Desse er ikkje organiserte av sokneprest/stab.

## Kvinnenes Internasjonale bøn nedag -

Kvinnenes Internasjonale bøn nedag er første fredag i mars kvart år. Dette har vore markert i Fusa i mange år. I 2023 hadde ein samling på Foer bedehus. Dette er eit økumenisk tiltak.



**Open kyrkje** vert skipa til av Strandvik kyrkjeutval og tilsette kvar månad i Strandvik kyrkje. Den timen kyrkja er open kan ein kome og gå slik det passar, sitje ned og høyre musikk og song frå lokale aktørar, tenne lys o.l.

### Felleskyrkjeleg arbeid

Soknet har godt samarbeid med kristne lokale lag og organisasjonar; m.a. bedehus, barne/ungdomsklubbar og kor. I 2023 har ein samarbeidd med Samnanger sokn om noko konfirmantarbeid.

### Kyrkjemusikk 2023

Ved ein del gudstenester hadde kantor ansvar for innslag av lokale kor eller solistar. **Kyrkjekoret** var med på nokre av dei. Koret «**Sine Nomine**», også leia av kantor, deltek òg på gudstenester m.m. Elles vart det m.a. arrangert 5 julekonsertar i kyrkjene våre, Sopran og pianokonsert i Hålandsdal kyrkje, minikonsert med Fjord'n barnekor. Fusa sokn var òg medarrangør ved diverse konsertar i Hålandsdal kyrkje; Karin Krogh, Ytre Suløen Jazzband og Louisiana Washboard 5.



«Sine Nomine» syng i Strandvik kyrkje.

### Informasjon

Fusa kyrkjeblad vart gitt ut 4 gongar i 2023. Dessutan er ein bevisst bruken av lokalmedia med annonsering og informasjon. Kyrkjelyden er aktiv på Facebook, - søk opp Fusa sokn. Ein har også bygd opp ein base der ein sender ut SMS 1-2 gongar pr veke. Der er om lag 170 mottakarar av slik SMS. Fusa sokn har og ei nettside på Den norske kyrkja sin plattform. Søk på: [www.kyrkja.no/fusa](http://www.kyrkja.no/fusa).

### G. Samarbeid skule, barnehage og kyrkje

Det har vore eigen plan for samarbeidet skule – barnehage – kyrkje – som er vedteken av gamle Fusa kommune og sokneråd. Det er starta arbeid med ny plan for heile Bjørnafjorden kommune, men arbeidet har stoppa opp p.g.a. prioriteringar hos kommunen.

I Fusa sokn tilbyr me enn so lenge tiltak til skular og barnehagar, alt etter sesong og vår kapasitet.

Kyrkjelydspedagogen hadde våren 2023 samarbeid med fortidsminneforeininga om besøk i **Holdhus kyrkje** for alle 5., 6. og 7. klassingane i Fusa. Responsen var god – 5 skular blei med. Det var andre gongen ein gjennomførte dette tiltaket, sist gong med yngre elevar.

### H. Medarbeidarskap

Tal uløna medarbeidarar ligg på omlag 120 personar, litt synkande tal. Desse saman med dugnadsfolk reknar ein med *utfører to til tre årsverk* kvart år. Men me ser at det er større og større utfordring å få frivillige medarbeidarar som kan gå inn å ta leiaransvar, og å binde seg over tid! Medarbeidarskap har over tid vore eit av satsingsområda til soknerådet. Det er registrert i underkant av 50 frivillige medarbeidarar som på rundgang tok del i

førebuing og gjennomføring av gudstenester i soknet. Nokre frivillige deltek i trusopplæringsarbeidet og i barne- og ungdomsarbeidet generelt, tillegg kjem frivillige som tek del i det diakonale arbeidet, familie-mix, komité- og utvalsarbeid, og anna arbeid som t.d. kakebaking og kyrkjeskys.

Soknerådet vedtok i 2022 ny «Plan for medarbeidarskap» med fokus på dei uløna medarbeidarane. Planen gjeld for perioden 2022-2025. I 2023 vart desse særskilde tiltaka for og saman med frivillige medarbeidarar gjennomført:

- Utdeling av Bibelleseplan
- Invitasjon til inspirasjonskonsert I Hålandsdal kyrkje

### **Utval**

Nytt sokneråd vart vald hausten 2023 og er vald for 4 år. Rådet har oppnemnd 5 kyrkjeutval og sit sjølv i 4 ressursgrupper. Alt utvalsarbeid er frivillige tenester.

### **J. Soknerådet sin økonomi**

Årsmeldinga viser til budsjett og rekneskapsrapport for 2023. Fusa sokneråd har etter tilhøva tilfredstillande økonomi, p.g.a. at ein har litt reservar på bok. Men desse små reservane forsvinn fort viss ein må tæra på dei fleire år på rad. Difor er det viktig for soknet å halda oppe fokuset på gjevarteneste og at det er kyrkjelyden i lag som held aktivitetsnivået på eit høgt nivå gjennom gåver og engasjement.

Fusingane har tradisjon for å bidra godt; så òg i 2023:

-Elevstipend Tabor inkl. to konkrete studentar: kr. 35.000,-

-Brannskadde born i Sør-Etiopia: ca kr. 100.000,- inkl. overskott frå Bruktbuo  
-Diakoni i Fusa inkl. matgåve: kr. 170.000,-  
-Kirkens Nødhjelp: kr. 65.000,-  
-Eksterne offer: kr. 118.000,-  
-Offer til kyrkjelydsarbeidet: kr. 33.000,-  
-Offer til barne- og u.arbeidet: kr. 73.000,-  
-Gåver til barne- og u.arbeidet: kr. 135.000,- inkl. overskot frå Bruktbuo  
-Kyrkjeblad: kr. 63.000,-

### **K. Organisering og endringar**

Administrativt og personalmessig har det vore nokre endringar i 2023: Norunn Rød Markhus hadde redusert stilling til 40%. Ny kyrkjelydsarbeidar Gry Mjelde vart tilsett frå 1. sept. Hildegunn Myrliid Eide vart tilsett som Kyrkjelydspedagog frå 1. desember. Hartvig Haugen avslutta si teneste etter 16 år, og vart pensjonist 1. september. Dagleg leiar har i heile 2023 i tillegg hatt rolla som fungerande kyrkjeverje for Bjørnafjorden.

### **Fusa sokneråd**

11. september var det val til nytt sokneråd. Fusa sokneråd 2019-2023 regjerte til 30. oktober og bestod av: Bodil Samnøy, Roald Samnøy, Sigbjørn Sundfjord (leiar), Toril Hjartåker Hauge, Lars Erik Dalland, Olaug Elise Mjelde (nestleiar), Roger Hoel og Stina Samnøy Skare (til febr.2022). Varamedlemmer: Britt Mari Gjerde (fast medlem frå febr.2022), Jan Ole Høiby Hansen, Øyvind Nordbø, Samson Øpstad og Marte Hafstad-Johansen.

Soknerådet hadde vald to medlemmer til Bjørnafjorden kyrkjelege fellelråd, Roald Samnøy og Lars Erik Dalland. Jon Håkon

Øen frå Os var leiar for fellesrådet i perioden.

Nytt sokneråd i perioden 2024-2027 er: Sigbjørn Sundfjord (leiar), Britt Mari Gjerde (nestleiar), Toril Hjartåker Hauge, Lars Erik Dalland, Inger-Lise Prestegard, Øyvind Nordbø, Jan Ole Høiby Hansen, Hartvig Haugen. Varamedlemmer: Audny Elise Samnøy Stuen, Linda Frøyseth, Atle Næss, Samson L. Øpstad, Engel Magne Berge.

Fusa sokneråd sine representantar i Bjørnafjorden kyrkjelege fellesråd er Lars Erik Dalland og Øyvind Nordbø. Lars Erik er vald til leiar i fellesrådet for 2024.

## L. Fusa sokn framover

Gud til ære – fusingar til gagn!

Det er det me er kalla til som kyrkjelyd.

Me ynskjer å styrka alle deler av arbeidet vårt, men føresetnader rundt oss er i endring og det er naudsynt for soknet å ta nokre viktige prioriteringar i tida som kjem. I dette må me be om at vårt arbeid og det me legg til rette for i Fusa, byggjer Guds rike.

Guds ord til oss er det same uansett og kallet vårt er å følgja han og gå ut med evangeliet.

## Me bed om

- Vekst i kyrkjelyden vår
- Gode, trygge fellesskap i kyrkjelyden vår
- Eit disippelgjjerande barne- og ungdomsarbeid i kyrkjelyden vår
- Eit sterkt misjonalt fokus i kyrkjelyden vår
- Diakonal tanke og handlekraft i kyrkjelyden vår
- Ei evangelisk og styrkjande forkynning i kyrkjelyden vår
- Å få vera ein inkluderande kyrkjelyd.



Eikelandsosen 31.01.2024

Handwritten signature of Hans Einar Markhus in black ink.

Hans Einar Markhus  
Dagleg leiar Fusa sokn

Handwritten signature of Sigbjørn Sundfjord in blue ink.

Sigbjørn Sundfjord  
Leiar Fusa sokneråd